















陽風

年五月十五日午時隨例入浴失足沸湯中從頸及腰  
腕而漸治平方喻兩月而後愈雖信是諸苦而於苦  
中忽見平日過咎生大慚愧發菩提心益平日四大  
無恙行坐隨意眠起隨意飲食隨意談笑隨意不知  
其爲人天大福也安享此福復思念六道衆生  
我此一餉安樂將地獄衆生捱燒存賒者不知釋  
許苦矣饑鬼賤生飲銅食土者不知經歲許苦矣畜  
生衆生被斃自較刀割煎烹者不知經歲許苦矣  
得爲人而饑寒遘遘者服役疲勞者疾病纏綿者







湯厄一

辛丑孟春十日。予隨例入浴。失足沸湯中。從踵及股。既而調治乖方。踰兩月而後愈。雖備歷諸苦。而於苦中。照見平日過咎。生大慚愧。發菩提心。蓋平日四大無恙。行坐隨意。眠起隨意。飲食隨意。談笑隨意。不知其爲人天大福也。安享此福。無復思念六道衆生。且我此一餉安樂時。地獄衆生。挫燒舂磨者。不知經幾許苦矣。餓鬼衆生。飲銅食血者。不知經幾許苦矣。畜生衆生。啣鐵負鞍。刀割鼎烹者。不知經幾許苦矣。縱得爲人。而饑寒逼迫者。服役疲勞者。疾病纏綿者。眷



屬分離者。刑罰責治者。牢獄監禁者。徵輸困乏者。水溺火焚而死者。蛇螫虎嚙而死者。含冤負枉而死者。其苦亦不知幾許。而我弗知也。自今以後。得一餉安樂。卽當思念六道苦惱衆生。攝心正意。願早成道果。普濟含識。俾齊生淨土。得不退轉。刹那自肆。何以上報佛恩。而下酬檀信也。勵之哉。

湯厄二

佛言。人命在呼吸間。予平日亦常舉此以警策大衆。而實未嘗身親經歷之也。及予之罹湯厄也。方其入浴。身安心泰。洋洋自如。俄而蹈沸釜中。幾死矣。其得



生者幸也。龍天救之也。夫爲時刹那耳。而死生係焉。命在呼吸。豈不誠狀乎哉。則知爲僧者。於佛所說。以勸他人。恒切。而以勸自己。或疎。通弊也。予於是大愧。大駭。而大自戢。

湯厄

三

予平日論到病中做工夫處。亦知畢陵伽婆蹉所謂純覺遺身矣。亦知馬大師所謂有不病者矣。亦知永嘉所謂縱遇風刀。常坦坦。假饒毒藥。也閒閒矣。亦知肇公所謂四大本空。五蘊非有矣。及乎足入沸湯。從頭檢點。痛覺在身。誰是遺身者。我今受病。誰是不病。



者鋒刀毒藥切於肌膚誰是坦坦閒閒者四大五蘊實爲吾身實爲吾累誰是本空非有者乃知平日乾慧都不濟事若無定力甘伏灰門彼口頭三昧祇自瞞耳噫可不勉歟

湯厄

四

予見屠酤之肆生置鼈鱉蝦蟹之屬於釜中而以百沸湯烹之則諭之曰彼衆生力弗汝敵又微劣不能作聲耳若力敵則當如虎豹噉汝若能作聲冤號酸楚之聲當震動大千世界汝縱逃現報而千萬劫中彼諸衆生不放汝在汝試以一臂納沸湯中少頃而



出。則知之矣。今不意此報。乃我當之。因思自少至老。雖不作此業。而無量生來。既宿命未通。安保其不作也。乃不怨不尤。安意忍受。而益勤修其所未至。

### 經教

有自負參禪者。輒云達磨不立文字。見性則休。有自負念佛者。輒云止貴直下。有人何必經典。此二輩人有真得而作是語者。且不必論。亦有實無所得。而漫言之者。大都不通教理。而護惜其短者也。予一生崇尚念佛。朕勤勤懇懇。勸人看教。何以故。念佛之說。何自來乎。非金口所宣。明載簡冊。今日衆生。何由而知。



十萬億刹之外。有阿彌陀也。其叅禪者。藉口教外別傳。不知離教而叅。是邪因也。離教而悟。是邪解也。饒汝叅而得悟。必須以教印證。不與教合。悉邪也。是故學儒者。必以六經四子爲權衡。學佛者。必以三藏十二部爲模楷。

語錄

古人道明德立。足爲人天師表。然後有語錄垂世。大率有二。或門人所記。如六祖壇經之類。是也。或手自作之。如中峰廣錄之類。是也。我實凡夫。自救不了。爲吾徒者。慎勿筆吾一時偶爾之談。刊爲語錄。不唯妄。



自尊大。又偶爾之談。或有爲而發。或因人而施。未是究竟了義。而況聽者草草入耳。便形諸紙墨。亦恐有悞人之過也。

聞謗

經言人之謗我也。出初一字時。後字未生。出後一字時。初字已滅。是乃風氣鼓動。全無真實。若因此發嗔。則鵲噪鴉鳴。皆應發嗔矣。其說甚妙。而或謂設彼作爲謗書。則一覽之下。字字具足。又永存不滅。將何法以破之。獨不思白者是紙。黑者是墨。何者是謗。況一字一字。皆從篇韻湊合而成。然則置一部篇韻在案。



是百千萬億謗書。無時不現前也。何惑之甚也。雖朕此猶是對治法門。若知我空。誰受謗者。

愚之愚

世人以不識字不解事爲愚。此誠愚也。非愚之愚也。讀盡五車書。無字不曉。收盡萬般巧。無事不能。乃至談玄說禪。靡不通貫。而究其真實處。顛倒迷惑。反見笑於向之所謂愚者。非愚中之愚而何。

預了

無常迅速。雖老少無別。然年少人猶處未定之天。妄冀長壽。若老年人則定朕光景無多矣。須把身世事。



處分了當從他無常朝到暮到撒手便行無所繫累  
此晚境大要緊處不可忽不可忽

### 廣覽

看經須是周徧廣博方得融貫不致偏執蓋經有此  
處建立彼處掃蕩此處掃蕩彼處建立隨時逐機無  
定法故假使只看楞嚴見勢至不入圓通而不廣覽  
稱讚淨土諸經便謂念佛法門不足尚矣只看達磨  
對梁帝語見功德不在作福而不廣覽六度萬行諸  
經便謂有爲福德皆可廢矣反而觀之執淨土非禪  
宗執有爲非無爲亦復如是喻如讀醫書不廣者但



見治寒用桂附而斥芩連治虛用參耆而斥枳朴不知芩連枳朴亦有時當用而桂附參耆亦有時當斥也是故執醫之一方者誤色身執經之一義者誤慧命予嘗謂六祖壇經不可使無智人觀之正慮其執此而廢彼也

求人過

見人飭躬立德名稱頗聞便多方求覓其過此忌心也薄道也或見人有所著述其求過也亦朕不知聞一善行覽一好書皆當隨喜讚嘆而反掩之滅之是誠何心哉若果行係僞行書係邪書自應正言公論



明斥其非。又不當半褒半譏。依阿進退。

謀斷

古稱玄齡善謀。如晦善斷。蓋謀與斷當兼備而不可一缺者。予於事多有見之。極明而持之不武。以此致悞。常悔之恨之。故禪門貴悲智雙足。而謀與斷俱智所攝。謀而乏斷。正能見而不能持也。此終是智淺而不深。偏而不全耳。大宜勉旃。

禪佛相爭

二僧遇諸途。一叅禪。一念佛。叅禪者謂本來無佛。無可念者。佛之一字。吾不喜聞。念佛者謂西方有佛。號



阿彌陀憶佛念佛。必定見佛。執有執無。爭論不已。有少年過而聽焉。曰。兩君所言。皆徐六擔板耳。二僧叱曰。爾俗士也。安知佛法。少年曰。吾誠俗士。朕以俗士爲喻。而知佛法也。吾梨園子也。於戲場中。或爲君。或爲臣。或爲男。或爲女。或爲善人。或爲惡人。而求其所謂君臣男女善惡者。以爲有。則實無。以爲無。則實有。蓋有是卽無。而有無是卽有。而無有無俱非真。而我則湛然常住也。知我常住。何以爭爲。二僧無對。

武夷圖

予病中有贈以武夷九曲圖者。閱之忻然。因思古人



沉疴不起。一友教翫輞川圖。不浹旬而愈。況西方極樂世界。繪畫流布。朝夕叅禮。而未聞奇驗速効。如輞川者。何耶。良由輞川蹟在寰中。易爲描寫。極樂境超世外。難以形容。則不若繪輞川者之備極工巧。聳人心目。故也。彼鷄頭摩之所傳。十六觀經之所說。亦略示其槩而已。夫極樂世界。忉利兜率。化樂諸天。所不能及其少分。使人得而詳覩。何止四百四病之俱忘。將八萬四千煩惱諸病。皆消滅無餘矣。昔人謂神棲安養。又謂先送心歸極樂天。豈徒然哉。

談宗



予未出家時。乍閱宗門語。便以情識模擬與一座主書。左縱右橫。座主憚焉。出家數年後。重會座主於一宿菴。勞問間。見予專志淨土。語不及宗。矍然曰。子向日見地超卓。今反卑近。何也。予笑曰。諺有之初生牛犢不畏虎。識法者懼。君知之乎。座主不答。

念佛

世人稍利根。便輕視念佛。謂是愚夫愚婦勾當。彼徒見愚夫愚婦口誦佛名。心遊千里。而不知此等是名讀佛。非念佛也。念從心。心思憶。而不忘。故名曰念。試以儒喻。儒者念念思憶孔子。其於孔子不亦庶幾乎。



今念念思憶五欲。不以爲非。而反以念佛爲非。噫。似此一生空過。何如作愚夫愚婦耶。而惜乎智可能也。愚不可能也。

### 僧定空

吳泗洲寺僧定空。棄應院閉關。堯封山。嘗寄予所發誓願及稟告十方等語。予嘉嘆希有。俄而魔著。遂癲狂以死。予甚悼焉。揆其由。蓋由乍起信心。有信無慧。故也。古人心地未通。不遠千里。參師訪道。出一叢林。入一保社。乃至窮遊徧歷。曾不休息。得意之後。方於水邊林下。長養聖胎耳。何得纔離火宅。便入死關。有



過不知有疑莫辨。求升而反墮。又奚怪其然哉。頗有  
初心學人。結茅溪山。孤子獨居。自謂高致。雖未必魔  
癲。而亦頓失利益不少。明者試一思之。

行脚

予單丁行脚時。忍飢渴。衝寒暑。備歷諸苦。今幸得把  
茆蓋頭。雖不識修行。而識慚愧。雲水乍到。供事唯勤。  
已身受用。不敢過分。蓋謂曾爲浪子。偏憐客。窮漢起  
家。惜土如金也。今乍入緇門。便住見成菴院。事事如  
意。喻似富家兒。不諳民間疾苦。縱才智兼人。無賴叅  
訪。而閉門自大。習成我慢。增長無明。亦所失多矣。



# 妙宗鈔

曩一僧謂予曰。佛示西方本爲普利諸根。速超生歿。是易行道。而知禮法師。純以台教精深。觀法釋之。使易反成難。失如來曲爲凡夫本意。此論亦甚有理。今思之。古人謂解佛經。寧以淺爲深。毋以深爲淺。則妙宗所說。利根者自悟。淡理。鈍根者亦不失依經直觀。求願往生。似無所礙。

## 出神一

或問仙出神。禪者能之乎。曰。能之而不爲也。楞嚴云。其心離身。反觀其面。是也。而繼之曰。非爲聖證。若非



聖解。卽受群邪。是能之而不爲也。又問神之出也。有陰有陽。楞嚴所云。陰神也。仙出陽神。禪者能之乎。曰。亦能之而不爲也。或者愕曰。母愕也。爾不見初祖已沒。隻履西歸乎。爾不見寶誌公。嶽中一身。市中一身乎。爾不見瀉山晏坐靜室。乃於庄上喫油糍乎。朕亦不名聖證。宗門呵之。昔一僧入定出神。自言我之出神。不論遠近。皆能往來。亦能取物。正陽神也。先德責云。圓頂方袍。叅禪學道。奈何作此鬼神活計。是故吾宗大禁。不許出神。

出神二



又問神有何過。曰。神卽識也。而分粗細。有出有入者。粗也。直饒出入俱泯。尚住細識。細之又細。悉皆渾化。始得本體耳。而著於出入。以爲奇妙。前所謂無量劫來生死本。痴人認作本來人也。

聞訃

聞人訃音。必大驚訝。此雖世間常情。狀生必有歿。亦世間常事。自古及今。無一人得免者。何足驚訝。持其虛生浪歿。而不聞道。是重可驚訝。而恬不驚訝。悲夫齋素。

富貴人不能齋素。其故有二。二者耽芻豢之悅口。二



者慮藜藿之損身。不知肉食蔬食。體之肥瘠。或因之而壽。天不與也。且鹿之壽最永於諸獸。而所食者草耳。虎食肉。而壽之長短。於鹿何如也。鹿不肉而壽。人何獨不然。雖然有厄於病苦。心雖欲齋。而力不副者。有制於所尊。心雖欲齋。而勢弗克者。則姑行月齋日齋。及三淨肉。但堅持不殺可也。久之宿習當自斷。

輪迴根本

圓覺謂輪迴以愛欲爲根本。而此愛欲百計制之。莫可除滅。蓋資育無所施其勇。良平無所用其智。而離婁公輸無所着其明巧者也。雖不淨觀。正彼對治。而



博地凡夫障重染深。祇見其淨。不見其不淨。觀法精微。鮮克成就。然則竟如之何。經云。欲生於汝意。意以思想生。今觀此想。復從何生。研之究之。又研究之。研之不休。究之不已。老鼠入牛角。當必有倒斷處。

病者衆生之良藥

世人以病爲苦。而先德云。病者衆生之良藥。夫藥與病反。奈何以病爲藥。蓋有形之身。不能無病。此理勢所必然。而無病之時。嬉怡放逸。誰覺之者。唯病苦逼身。始知四大非實。人命無常。則悔悟之一機。而修進之一助也。予出家至今。大病垂歿者三。而每病發。悔



悟增修進。由是信良藥之語。其真至言哉。

蛇成龍

昔人有喻。如蛇成龍。不改其皮。如人成佛。不改其面。此破愚夫着相求佛。蓋彷彿爲比。非的喻也。斷章取義。非全喻也。又有謂蛇伏地內。由修鍊而成龍。不知此性稟使然。非修鍊所致。是故污水中虫。化而爲蚊。廁囷中虫。化而爲蠅。蜣之爲蟬。蠶之爲蛾。雉之爲蜃。雀之爲蛤。鯊之爲虎。鯢之爲鵬。如是之類。種種非一。豈其有修鍊之術乎。又不見草之爲螢。飯之爲螺。瓦之爲鴛鴦。無情而化。有情修鍊。安在。吾恐不明理者。



名爲學道。潛作邪因。妄冀邪果。不得不辨。

### 名利

榮名厚利。世所同競。而昔賢謂求之旣不可得。却之亦不可免。此却之不可免一語。最極玄妙。處世者當深信熟玩。蓋求不可得。人或知之。却不可免。誰知之者。如知其不可免也。何以求爲。又求之未得。不勝其慍。及其得之。不勝其喜。如知其不可免也。何以喜爲。又已得則喜。他人得之則忌。如知其不可免也。何以忌爲。庶幾達宿緣之自致了。萬境之如空。而成敗利鈍。興味蕭然矣。故知此語玄妙。



臨終正念

經言。人欲終時。聞鐘磬聲。增其正念。而杭俗亡者。氣絕良久。方乃召僧擊磬。已無及矣。又訛爲之說曰。磬之鳴也。促亡人行赴閻羅也。其謬一至於此。

花香

庭中百合花開。晝雖有香。澹如也。入夜而香始烈。夫鼻非鈍於晝而利於夜也。白日喧動。諸境紛雜。目視焉。耳聽焉。鼻之力爲耳目所分。而不得專也。用志不分。乃凝於神。信夫。

人虎傳



說海載人虎傳。一僧戲披虎皮於山徑間。有見而怖走。遺其橐囊者。輒取之。皮忽着身。遂成虎。不敢歸寺。而心歷歷然人也。漸飢。不得已食狐兔羊犬。旣而捕得人。將食之。視之。僧也。大悔恨。恨極悲號。舉身自擲。皮忽墮地。還復人體。因感斯異。乃破衲行乞。徧叅知識。刻心辨道。後竟成名德。云。經云。一切唯心造。觀於是尤信。

### 六道互具

六道之中。復有六道。且以人言之。有人而天者。諸國王大臣之類是也。有人而人者。諸小臣及平民衣食。



饒足處世安然之類是也。有人而修羅者。諸獄吏屠兒。劊子之類是也。有人而畜生者。諸負重力役。恒受鞭撻之類是也。有人而餓鬼者。諸貧窮乞人。啼饑號寒之類是也。有人而地獄者。諸刑戮劓割之類是也。天等五道亦復如是。所以然者。昔因持戒修福。今得人身。而所修戒福有上中下。此三種中。復有三種。多無盡。各隨其心。感報不一。經云。一切唯心造。又觀於是尤信。

智慧

增一阿含經佛言。戒律成就。是世俗常數。三昧成就。



亦世俗常數。神足飛行成就。亦世俗常數。唯智慧成就。爲第一義。則知戒定等三學。布施等六波羅密。唯智慧最重。不可輕也。唯智慧最先。不可後也。惟智慧貫徹一切法門。不可等也。經云。因戒生定。因定發慧。蓋語其生發之次第。則然而要當知所重。知所先。知所貫徹。始得。雖然。此智慧者。又非聰明才辨之謂也。如前世智常悟中說。

### 外學

隋梁州沙門慧全。徒衆五百。中一人頗麗異。全素所不錄。忽自云。得那含果。全有疾。閉門。其人徑至榻前。



問疾而門閉如故。明日復然。因謂全曰。師命過當。生婆羅門家。全云。我一生坐禪。何故生彼。答云。師信道不篤。外學未絕。雖有福業。不得超詣。今時僧有學老莊者。有學舉子業經書者。有學毛詩楚騷及古詞賦者。彼以禪爲務。但外學未絕。尚緣此累道。今恣意外學。而禪置之罔聞。不知其可也。

靈裕法師

裕法師之說經也。或一字盤桓。動經累日。或片時之頃。便銷數卷。或分科已定。及至後講。更改前科。增減出沒。隨機顯晦。學者疑焉。裕曰。此大士之宏規也。可



以恒情斷乎。裕師蓋得無礙辨才。庶幾乎於法自在。而拘名着相。以文害辭。以辭害意。與夫叅死句之輩。何足以知之。今人不可執己見而蔑視勝流。輕談橫議。又不可昧己量而效嚙先德。妄行自用也。

### 行脚住山

今人見玄沙不越嶺。保福不度關。便端拱安居。眼空四海。及見雪峰三登投子。九上洞山。趙州八旬行脚。便奔南走北。浪蕩一生。斯二者皆非也。心地未明。正應千里萬里。親附知識。何得守愚空坐。我慢自高。既爲生歿。叅師訪道。又何得觀山觀水。徒誇履歷之廣。



而已哉。正因行脚之士。自不如是。

楞嚴房融所作

有見楞嚴不獨義深。亦復文妙。遂疑是丞相房融所作。夫譯經館。番漢僧及詞臣居士等。不下數十百人。而後一部之經始成。融不過潤色其文。非專主其義也。設融自出己意。創爲是經。則融固天中天聖中聖矣。而考諸唐史。融之才智。尚非柳韓元白之比。何其作楞嚴也。乃超孔孟老莊之先耶。嗟乎。千生百劫。得遇如是至精至微至玄至極之典。不殞心信受而生此下劣乖僻之疑。可悲也夫。可悲也夫。



果報一

經言萬法唯心。錯會者。謂無心則無因無果。故不患有業。唯患有心。有業無心。閻老子其奈我何。遂安意造業。無復顧忌。不知無心有二。如理思惟。用心之極。而自然入於無心三昧者。真無心也。起心造業。又起心制心。強制令無。似得無心。心恰成有。心有則業有。閻老子鐵棒。未放汝在。

果報二

又經言。具足智慧菩薩。脫使墮落在畜生中。畜生中王在餓鬼中。餓鬼中王。錯會者。謂有智則能轉業。故



不患有業。唯患無智。有業有智。閻老子其奈我何。遂  
安意造業。無復顧忌。不知經稱智慧。非等閑世智之  
謂也。且汝智慧。得如文殊身子否。縱不及此。次而下  
之。得如善星調達否。善星博學十八。香象所載法聚。  
調達得羅漢神通。而俱不免生陷地獄。況汝智慧。未  
必勝此二人乎。杯水不能熄車薪之火。螢光不能破  
幽谷之昏。今之小智。滅業幾何。閻老子鐵棒。未放汝  
在

塞翁

得失曾無定形。禍福互爲倚伏。塞翁一段因緣。人皆



知之而未必信之也。予失足沸湯。筋攣不伸。畜雙拐爲二侍。若將終身焉。作跛腳法師歌自嘲。有祇愁此脚不終疾之句。旣而足伸如故。笑以爲詩讖。而依然奉以爲詩規也。且感且懼。無忘射鉤。

### 神通

神通大約有三。一報得。一修得。一證得。報得者。福業自致。如諸天皆能徹視徹聽。及鬼亦有通是也。修得者。習學而成。如提婆達多。學神通於阿難尊者。是也。證得者。專心學道。無心學通。道具而通自具。但遲速不同耳。如古今諸祖。諸善知識。是也。較而論之。得道



不患無通得通未必有道。先德有言。神通妙用。不如  
閤黎佛法。還須老僧。意有在矣。試爲之喻。世間官人  
所有爵祿冠服府署儀衛等。若神通然而亦有三種。  
其報得者。如功勲蔭襲。自然而有者也。其修得者。人  
力夤緣。古人所惡。不由其道者。是也。其證得者。道明  
德立而位自隨之。仲尼云。學也。祿在其中矣。是也。是  
三者。勝劣可知也。

大豪貴人

世間大豪貴人。多從修行中來。然有三等。其一持戒  
修福。而般若正智。念念不忘。則來生雖處高位。五欲



具足而心則時時在道。真所謂有髮僧也。其二持戒修福而般若之念稍疎。則來生遊戲法門而已。其三持戒修福而於般若邈不繫念。則來生爲順境所迷。背善從惡。甚而謗佛毀法。滅僧者有矣。鞠其因地。則均之修行人耳。而差別如是。來生更來生。其差別又何如也。寒心哉。

### 天台清涼一

人有恒言曰天台賢首。愚嘗究之。南嶽舉其綱。而萬目畢張。則莫備乎天台。賢首持其衡。而千星交羅。則莫備乎清涼。蓋自有佛法以來。天台集其大成。自有



天台以來清涼集其大成矣。故當以二師相對而名宗也。或曰。人於天台無議矣。於賢首或置喙焉。何也。曰。喙賢首者亦百喙而一中耳。又向不云乎。賢首之道。至清涼而始備。是則天台清涼二師。恩如父母。道亦如父母。且清涼可得議乎。或未答。予笑曰。母勞爾思也。天台之後有清涼。猶堯舜之後有孔子也。而又何議也。

天台清涼二

或曰。彼四教。此五教。判然二宗矣。然亦有同歟。曰。母以二爲也。四之與五。猶五蘊六根。開合焉耳矣。五教



之小。卽攝入四中之藏。而藏之爲言。猶迹涉於混。故另分曰小也。五教之頓。卽攝入四中之圓。而達磨直指。正屬乎頓。欲其彰顯。故特標曰頓也。二宗之圓教。一也。而華嚴十玄之旨。四之圓。猶含其意。而未盡。故小始終頓之後。而獨冠以一乘之圓。有深意也。以其各爲一時之所依歸。而均爲萬代之所程式。以是名之二宗。宗常二。而道常一。岐而二之。則非矣。

### 栢堂山居詩

永明石屋中峰諸大老。皆有山居詩。發明自性。響振千古。而兼之乎氣格雄渾。句字精工。則栢堂四十咏。



尤爲諸家絕唱。所以然者。以其皆自真參實悟。溢於中而揚於外。如微風過極樂之寶樹。帝心感乾闥之瑤琴。不搏而聲。不撫而鳴。是詩之極妙。而又不可以詩論也。不攻其本。而擬其末。終世推敲。則何益矣。願居山者。學古人之道。毋學古人之詩。

### 山色

近觀山色。蒼然其青焉。如藍也。遠觀山色。鬱然其翠焉。如藍之成靛也。山之色果變乎。山色如故。而目力有長短也。自近而漸遠焉。青易爲翠。自遠而漸近焉。翠易爲青。是則青以緣會而青。翠以緣會而翠。非唯



翠之爲幻。而青亦幻也。蓋萬法皆如是矣。

### 見生夢

夜夢中多見生事。罕夢前生何也。蓋夢以想成。想多見生。不及前生故也。且三乘賢聖。尚有隔陰出胎。乍時之昏。況具縛凡夫。脫一殼入一殼。從母腹中顛倒而下。尚何能記憶前生耶。惟據其目前紛紛紜紜。晝則爲想。夜則爲夢耳。而或時未見之物。未作之事。未歷之位。現於夢中者。則無始之境。任運而然。亦莫知其所以然。而然也。想陰旣破。寤寐恒一。幸相與致力焉。



禮懺僧

有修淨土懺法者。一僧謂曰。經不云乎。若欲懺悔者。端坐念實相。胡爲是僕僕爾。亟拜也。懺者問。如何是實相。僧云。心不起妄。卽是實相。又問。心是何物。妄又何物。能制心者。復是何物。僧無對。懺者曰。吾聞之懺以理爲正。以事爲助。雖念實相。而三業翹勤。亦不相礙。何以故。初機行人。未能卒與實相相應。須藉外緣。輔翼法華。謂我以異方便。助顯第一義。是也。起信亦言。末法衆生。修是法者。自懼不常值佛。如來世尊。有異方便。教令念佛。求生淨土。故知慈雲大師淨土懺。



法。酌古準今。至爲精密。與法華光明諸懺。俱事理雙備。人天交欽。照末法昏衢之大寶炬也。且治生產業。不背實相。是佛說否。僧云。如是。曰。然則禮懺不及治生產業乎。僧又無對。

### 南嶽止觀

南嶽大乘止觀中引起信論文曰。是故論云。三者用大。能生世間出世間善惡因果。故起信原無惡字。讀之令人駭然。且性惡雖是天台一家宗旨。然慈雲謂南嶽遠承迦葉。次稟馬鳴。而馬鳴以古佛示居八地。南嶽以異德名列神僧。不應先聖後聖兩相違悖。又



起信言約義豐辭精理極總括大乘諸了義經。一句一字不可得而增減者也。彼南嶽自創爲止觀則已。今引起信正出其來源。明有據也。而乃於本文所無輒爲增益。有是理乎。必後人爲之耳。或謂此書刻自慈雲。宜無贗雜。噫。安知非慈雲之後。又後人所增耶。我雖至愚。定知南嶽不改起信。請高明更詳之。

韓昌黎

世傳昌黎初闢佛。後遇大顛。頓有悟入。然考其文集有曰。近傳愈稍信釋氏。此傳者妄也。潮人無可與語。僧大顛頗聰明。識道理。故與之遊。其歸也。留衣服爲



別此人之情。非崇信其道。求福田利益也。觀此則悍然不信如故。安在其悟入也。雖然。若據示現影響。逆順贊揚。則不可測。安知昌黎非故爲是。引發因緣耶。不有昌黎之闢佛。何從有明教之非韓。鐘因擊而聲始洪。燭以剪而光愈茂。是故未得宿命。未具他心。未可縱口高談。臧否人物。

### 惺寂

止觀之貴均等尚矣。聖人復起。不能易矣。或有稍緩急於其間者。曰。經言因定發慧。則止爲要。以是相沿成習。修行之人多主寂靜。唯永嘉旣爲惺惺寂寂。



寂惺惺之說以明均等。而後文曰。惺惺爲正。寂寂爲助。則迥然獨得之見。從古至今無道及者。自後宗門教人看話頭。以期徹悟。而妙喜呵默。照爲邪禪。正此意也。是故佛稱大覺。衆生稱不覺。覺者惺也。永嘉之旨微乎。

道原

或問道德經云。吾不知其名字之曰道。則道之一言。自老子始。而萬代遵之。佛經之所謂道者。亦莫之能違也。則何如曰。著於易則云履道坦坦。紀於書則云。必求諸道。咏於詩則云周道如砥。五千言未出道之。



名已先立矣。況彼之所謂道者。乃法乎自然。如其空  
無來原。自朕生道。則清涼判爲無因。如其本於自朕。  
方乃生道。則清涼判爲邪因。無因邪因。皆異計耳。非  
佛之所謂道也。佛道則萬法由乎自心。非自朕。非不  
自朕。經言阿耨多羅三藐三菩提者。是無上正覺之  
大道也。尚非自朕。何況法自朕者。

菩薩不現今時

竊怪今時造業者多。信道者寡。菩薩旣度生無已。何  
不分身示現。化誘群迷。且昔佛法東流。自漢魏以迄  
宋元。善知識出世。若鱗次朕元季。國初猶見一二。



近胡寥寥無聞。如地藏願度盡衆生。觀音稱無刹不現。豈其忍遺未度之生。亦有不現之刹耶。久而思之。乃知菩薩隨緣度生。衆生無緣。則不能度。喻如月在天上。本無絕水之心。水自不清。月則不現。況今末法漸淡。心垢彌甚。菩薩固時時度生。而生無受度之地。是則臨濁水而求明月。奚可得乎。

如來不救殺業

復次。今時造業。惟殺尤甚。無論四海之廣。卽此一邑。於一日中。所殺生命。牛羊犬豕。鵝鴨魚鱉。動以千萬。其細微者。何可勝數。而春秋二時。饗天地。祀鬼神。蒸



嘗於祖考報德報功於先聖先賢。牲牷之用。不知其幾。而天地不矜。鬼神不憐。祖考不知。先聖先賢不潛爲禁止。至於如來。仁覆天地。慈攝鬼神。恩踰祖考。德冠於諸聖賢。何不稍示神通。或俾現受惡報。或令還着本人。則誰不戰懼改悔。而漠然若罔聞者。何也。久而思之。乃知今牛羊等。因昔造殺報在畜生。彼旃陀羅。卽前所殺。轉爲能殺。因緣會遇。始暢本懷。定業使然。無能救者。俟其業盡。狀後報息。雖天中天。聖中聖。亦末如之何也已。況宿報甫平。新殃更造。因果相循。吾不知其所終也。且往者莫諫。來者可追。則今斷殺



因後無殺果。如來明訓彰如日星。爲諸衆生而救殺業。不已至乎。

增減古人文字

友人處偶見野史一帙。及前輩警世詩偈。頗多增減舊文。因思古今著述。儒籍除六經論孟。梵典除佛菩薩經論。及出自名稱最顯赫諸大老。慎不敢動。其餘亦頗隨意增減。夫流通善法。利濟衆生。實出美心良意。而委任他人。俾之讐校。以致如是。願躬自主之。苟存殷重之心。必有爲吹藜者。

毒蛇喻



昔佛行田間。見遺橐在地。指之曰。毒蛇毒蛇。言已徑去。有耕夫荷鋤往擊之。則遺橐也。持而歸。得金數鎰。大喜過望。俄而聞於王。責令輸官。以爲獻。少匿多。楚掠備至。徵索無已。併其恒產俱盡。他日遇佛。泣曰。瞿曇。誑我。瞿曇。誤我。佛言。向汝道毒蛇。是毒蛇否。嗟乎。今之螫於毒蛇者衆矣。螫而無悔。而復受其螫者。亦衆矣。豈獨一耕夫哉。

食肉

有僧業楞伽。偶會緇素。一居士儒生也。斷肉茹素。同列相與咻之。楞伽僧不唯不解衆咻。反從而和之。勸



之生不得已爲一舉筋噫此僧他日讀楞伽至佛言有無量因緣不應食肉不知作何面貌

食肉二

世人於朋友戚屬見有斷肉茹素者不驚以爲奇則笑以爲愚夫人之與畜同一肉聚耳肉人不食肉獸此天理人情之所必至也亦何足奇而況謂之愚乎吁衆生之迷昧也極矣

曹溪不斷思想

有誦六祖偈云惠能沒伎倆不斷百思想對境心數起菩提作麼長揚揚自謂得旨便擬縱心任身一切



無礙。坐中一居士斥之曰。大師此偈。藥臥輪能斷思想之病也。爾未有是病。妄服是藥。是藥反成病。善哉言乎。今更爲一喻。曹溪之不斷百思想。明鏡之不斷萬像也。今人之不斷百思想。素練之不斷五采也。曹溪之對境心數起。空谷之遇呼而聲起也。今人之對境心數起。枯木之遇火而烟起也。不揣已而自附於先聖者。試閒處一思之。

#### 四知

天知。地知。子知。我知。楊伯起語也。議者謂人已之知異矣。天地則無二知也。愚少時亦以爲然。後讀內典。



佛罵意經有四知之說。正與此同。蓋云天神知地神知。彼心知我心知也。華嚴世主品主天主地主日主夜主山主海等。莫不有神。則伯起之說非謬。故知先賢語未可輕議。

### 四大五行

五行之在世間。春夏秋冬而中氣也。東西南北而中方也。天之經也。地之緯也。自朕之理而亦必朕之勢也。乃佛經不曰五行而曰四大。說者曰地水火有五行之三矣。金攝於地。木攝於風。則四未嘗不五也。此說良是而未盡也。宇宙之內。則羅之五行足矣。統論



乎宇宙之外。而要其成住壞空之極致。則四大始足。以該之。而猶未盡也。地水火風。又繼之空也。識也。念也。而成七也。此何說也。地之質最爲凝實。水之質不實而流行。火之質至不可捉摸。而風則有氣而無質矣。空則并氣而無之矣。狀後會歸於識。發動於念。從粗及微。通名七大。而始盡也。彼五行者。地水火風之分布。而成天成地成人物者也。五行狹而四大廣也。

### 世界

憶昔童子時。戲與諸童子相問難。謂天地盡處當作何狀。將空狀皆太虛歟。則此空者又何所止。將結實



如垣壁歟。則此實者又何所止。諸童子無以應笑而罷。而予則隱隱礙於胷中也。彼山海經所謂東西相去二億里。南北相去一億五萬里。祇據一方。誠管窺而已。後閱內典至虛空不可盡。世界不可盡。意始大豁。以爲非佛不能道。嗟乎。此未易言也。

年劫

因世界以推年劫。自今而追昔。昔何所始。自今而要後。後何所終。彼太極圖言太極而兩儀。而五行而萬物。則太極爲始。經世書約一元之數。而該之以十二萬九千六百年。則元之初爲始。狀太極又何始。元之



初又何始。縱令如歲序狀。今歲之前有往歲。而往之  
又往。誰爲最初之祖。始乎。又何時爲畢竟盡處。不復  
更始之永終乎。則冥狀似醉。後讀內典。至佛言無始。  
又言劫數不可盡。意始大豁。以爲非佛不能道。嗟乎  
此又未易言也。

學道莫先智

韓信楚士也。背楚之漢。楚卒以信困。漢以信興。夫前  
後一信耳。而二國之興廢因之。善用與不善用之故  
也。六根在人。不善用之。則名六賊。善用之。則種種神  
通妙用耳。煩惱卽菩提。豈不信哉。雖狀高帝之於信。



始待之猶夫人而蕭相國竒之。旣而請假王不之許。幾至僨事而留侯成之。朕則補偏救敝。默轉而潛維者。智臣之力也。學道莫先智。亦復如是。

道場放赦

道場中放赦。僧道二門時有之。夫道崇天帝。不知此赦。何人自忉利天宮領下人世。今羽士自爲之不幾於僞傳聖旨耶。僧奉佛。而佛在常寂光中。畢竟王何國土。都何城邑。統何臣民。詔勅制誥。出何官僚。而亦效彼道流。作爲赦書。此大可笑。今僧莫覺其非。齊家亦莫覺其非。何也。無已。則有一焉。奏請於天。乞其頒



赦允與否。唯天主之而已。若佛則慈悲普覆。猶如虛空。無一衆生不度。而奚以赦爲也。

### 水陸儀文

水陸齋爲普度盛典。金山儀文相傳。昔於大藏放光。今藏無此文。世遠不可考。未知盡出梁武皇祐律師否。若夫始終條理。詳而有章。凡聖交羅。約而能盡。辭理雙得。則四明磐師所輯六卷之文。最爲允當。況金山者。費廣而難舉。四明者。財省而易成。正應流通。無盡而舉世莫之行。浙諸郡亦莫之行。唯本境僅行之。而又不直接其原本。增以閒文。雜以冗舉。反於緊要。



處疎略可慨也。但第五卷說法開導處備陳三觀之旨。稍似過於繁密。更得簡直易曉。則幽明愚智兼利不遺盡美矣。復盡善矣。

見僧過

世有言人不宜見僧過。見僧過得罪。狀孔子聖人也。幸人知過。季路賢者也。喜過得聞。何僧之畏人知而不欲聞也。蓋不見僧過爲白衣言耳。非爲僧言也。僧賴有此罔行而無忌。則此語者。白衣之良劑而僧之砒酖矣。悲夫。

心不在內



楞嚴徵心。謂心不在內者。指真心也。若妄想心。則亦可云在內。此意微妙。未易與不知者道。世書曰。心藏神。神卽妄想。別名其所稱心。則肉團之謂耳。有義學輩。聞予言。搖首不信。今請以事明之。人熟寐。戲以物壓其心。則魘。或自手悞掩其心。亦魘。又戲畫睡人面。有至魘死者。此在內之明徵也。義學曰。如是則真妄成二物矣。曰。子徒知真妄不二。不知真妄一而常二。二而常一也。不觀水與冰乎。水冰不二。孰不知之。而水旣成冰。水流動而無定方。冰凝實而有常所。真無方。妄有所。亦猶是也。從真起妄。妄外無真。由水結冰。



水外無水。故其體常一而用常二也。義學曰。此子臆見終違楞嚴有據則可。曰。有據據在楞嚴諸君自不察耳。經云。一迷爲心。決定惑爲色身之內。雖在色身之內。不妨體徧十方。正徧十方之時。不妨現在身內。此意妄想破盡者。方能證之。吾與子尚在妄想中。葛藤且止。

生歿根本

黃魯直之言曰。溪求禪悅。照破生歿之根。則憂畏淫怒。無處着脚。但枯其根。枝葉自瘁。此至論也。但未明言。孰爲生歿根者。又禪悅下。要緊在照破字。若得禪



悅便謂至足。則內守幽閒。正生死根耳。須是窮叅力究。了了見自本性。則生死無處着脚。生死尚無處着脚。憂畏淫怒。何由而生。

### 齊人

子輿氏設齊人之喻。分明似一軸畫。又似一堂排場。戲劇。其模寫形容。備諸醜態。讀此而不惕。朕悔悟者。木石也。雖狀名利固世情之常。在有家者。未足深責。染衣而齊人。吾不知其何心也。吁乎傷哉。

### 至誠感人

羊祜遺敵帥以酒。衆難之。帥飲不疑。曰。豈有醜人羊



叔子哉。非真誠素孚。安能感人。一至於此。今號爲釋子者。其取信六道衆生。必如是而後可。又唐文皇縱死囚。約之來歸。歸不失期。雖後人作論駁難。而要之文皇此舉。實千古所希有。胡可訾也。非真誠素孚。安能感人。一至於此。今號爲釋子者。其不疑六道衆生。亦必如是而後可。易曰。中孚豚魚吉。吾以二事觀之。信朕

親善知識

先德云。譬如敝人執燭。不以人敝故。不取其照。卽孔子不以人廢言意也。藉口者。遂謂師不必擇賢。但資



其學識言論足矣。彼自不德。我何與焉。遂依之不違。寧知芝蘭鮑魚。漸染成性乎。論語曰。不以人廢言。又曰。因不失其親。亦可宗也。胡不合而觀之。

### 念佛不專一

予昔在鍊磨場中。時方丈謂衆云。中元日當作盂蘭盆齋。予以爲設供也。俄而無設。唯念佛三日而已。又聞昔有院主爲官司所勾攝。堂中第一座集衆救護。衆以爲持誦也。亦高聲念佛而已。此二事迴出常情。有大人作略。真可師法。彼今之念佛者。名爲專修。至於禱壽命。則藥師經。解罪愆。則梁皇懺。濟厄難。則消



灾咒求智慧則觀音文向所念佛束之高閣若無補於事者不思彼佛壽命無量况百年壽命乎不思念彼佛能滅八十億劫生死重罪况目前罪垢厄難乎不思彼佛言我以智慧光廣照無央界况時人所稱智慧乎阿伽陀藥萬病總持二三其心莫肯信服神聖工巧獨且奈之何哉

伎樂

或曰不作伎樂及不往觀聽此沙彌律非菩薩道也古有國王大臣以百千伎樂供佛佛不之拒則何如愚謂此有三義一者聖凡不可例論二者邪正不可



例論三者自他不可例論。我爲法王。於法自在。逆行順行。天且不測。大聖人所作爲。非凡夫可得而效。嚙也。一也。編古今事而爲排場。其上則香山目連。及近日曇華等。以出世間正法。感悟時人。其次則忠臣孝子。義士貞女等。以世間正法。感悟時人。如是等類。觀固無害。所以者何。此不可觀。則書史傳記亦不可觀。蓋彼以言載事。此以人顯事。其意一也。至於花月歡呼。干戈鬪鬩。誨姪啓殺。導欲增悲。雖似諷諫。昏迷實則滋長放逸。在白衣猶宜戒之。況僧尼乎。二也。偶爾自觀。猶可。必教人使觀。則不可。三也。慎之哉。



身者父母遺體

夢中忽憶二尊人病且亟悲甚既而曰猶可爲也則稍自慰正擬極力療治俄而夢也復悲甚既而復自慰曰猶可爲也吾今此身父母遺體也及吾尚存以父母遺體力行善事是吾親滅而不滅也况力學無生乎失今不自淬礪是則大可恨耳宏乎爾安得晏然而已乎

出谷喻一

詩咏鳥謂出自幽谷遷於喬木蓋別是非慎取舍之論也昔德山作青龍鈔初以爲三祇鍊修乃得成佛



而南方魔子。謂一悟了畢。吾當往滅其種。以報佛恩。當是時。是一片真實好心。耿耿於懷。特不自知其所見之謬耳。及夫受指教於婆子。親見龍潭。而積歲所寶所重。棄之如腐艸。故能終成大器。震耀末法也。向使封滯臆見。我慢自賢。喻如窶人。珍秘燕石。反謗賈胡。謂嫉已寶。雖有百婆子。千龍潭。其將若之何。

出谷喻二

二迦葉。目捷連諸阿羅漢。先師外道。已有成驗。自負不淺淺矣。而一聞佛。一見佛。幡狀改圖。積歲所尊所崇。棄之如鴻毛。故能續佛慧命。師表萬世也。向使先



入之言。牢主於中。便豎刹竿。堅壁自固。喻如病者死。守舊醫。縱有新方。掉首不顧。雖千佛出世。其將若之何。

丸餅誑兒

憶在家時。一兒晚索湯餅時。市門已掩。家人無以應。丸米粉與之。啼不顧。其母恚甚。予曰。易事耳。取米丸匾之。兒入手。啞狀而笑。時謂兒易誑。若此。因如今人輕淨土。重禪宗者。似焉。語以丸湯餅之淨土。則啼。易以匾米丸之禪宗。則笑。此真與兒童之見何異。嗟夫。

憂樂



貧者憂無財。慕富人之爲樂。而不知富人有富人之  
憂也。賤者憂無官。慕貴人之爲樂。而不知貴人有貴  
人之憂也。貧者賤者富者貴者。各憂其所不足。慕王  
天下者。以爲窮人世之樂。而不知王天下者。有王天  
下之憂也。而猶不知其憂之特甚也。而猶不知其反  
慕乎。群臣百姓之爲樂也。嗚呼。悉妄也。惟智人能兩  
無憂樂。而住於無憂樂者。亦妄也。非大悟大徹。無自  
由分。

根原枝葉

末法人業經論。其所尚。多在名繁相劇。而難爲記持。



者。義幽理晦而難爲剖析者。文隱句澀而難爲銷會者。以是騁辨博。誇新奇。而衲僧脚根下一大事。因緣置之罔聞。又寧知彼名相義理文句。皆從此中流出。是則攻枝葉而昧根原。永嘉所以浩嘆也。故曰。但得本。不愁末。祇恐時人於此信不及。放不下耳。

想見崑崙

漢莊伯微。每於日落時。面對西北。想崑崙山。久之。見崑崙仙人。傳法得度。此彷彿與西方日觀相似。但彼屬妄想。不修正觀耳。久積妄想。以精誠之極。尚得遂其所見。况一心正觀。三昧成就。而不往生者哉。



禪餘空諦辨僞

吳郡刻一書號禪餘空諦。下着不肖名曰雲棲祿宏著。刻此者本爲殖利。原無惡心。似不必辨。狀恐新學僧信謂不肖所作。因而流蕩。則爲害非細。不得不辨。書中列春夏秋冬四時幽賞。凡三十三條。姑摘一二以例餘者。一條云。孤山月下看梅花。中言黃昏白月。攜樽吟賞。夫出家兒不於清夜坐禪。而載酒賞花。是騷人俠客耳。不肖斤斤守分僧。安得有此大解脫風味。一笑。一條云。東城看桑麥。不肖住西南深山中。去東城極遠。不看本山松竹。而往彼看桑麥耶。一笑。一



條云。二塔基看春草。平生不識三塔基在何所。一笑。  
一條云。山滿樓觀柳。中言樓是不肖所構。自來無寸  
地片瓦在西湖。何緣有此別業。一笑。一條云。蘇堤看  
桃花。中似桃花比美人。此等淫艷語。豈剃髮染衣人  
所宜道。卽不肖未出家時。亦不爲也。一笑。一條云。蘇  
堤觀柳。中引如詩不成。罰依金谷酒數。不肖從出家。  
不曾與人聯詩。何況鬪酒。一笑。一條云。雪夜煨芋談  
禪。中所談皆鄙淺語。何人被伊喚醒。一笑。諸好心出  
家者。當知不肖定無此語。旣作緇流。必須持守清規。  
飭躬勵行。毋錯認風流放曠爲高僧也。祿宏謹白。



## 種種法門

譬如王師討伐。臨陣格鬪。以殺賊爲全勝。而殺賊者。或劔或槊。或槌或戟。乃至矢石。種種隨用。唯貴精於一技而已。以例學人。則無明惑障。如彼賊人。種種法門。如劔槊等。破滅惑障。如獲全勝。是知無論殺具。但取殺賊。賊旣殺已。大事斯畢。所云殺具。皆過河筏耳。不務其大。而沾沾焉。謂劔能殺人。槊不能殺。豈理也哉。叅禪者。譏念佛爲著相。勵行者。呵修定爲落空。亦猶是也。故經云。歸元無二道。方便有多門。先德云。如人涉遠。以到爲期。不取途中。強分難易。



棋述

个案院全

三

























